



Ina scena or dal toc «CHUR 1947». Amez l'actor sursilvan Curdin Caviezel.

FOTO MAD/MOMIR CAVIC

# Crimi sut tschiel avert

Chalira po manar a schleta luna e per part ad agressiuns – ma schizunt a mazzaments? Quai para d'esser il cas en il giu su tschiel avert «CHUR 1947» che sa basa sin il roman da Philipp Gurt. El vegn preschentà actualmain a Cuira. La FMR ha discurrì cun Nikolaus Schmid, il president da «FRECH» («Freilichtspiele Chur») che surprena la rolla da Walter Caminada e cun Curdin Caviezel che gioga Jürg Mehli e Peter Marugg.

LAURA SCHÜTZ/FMR

«Die Hitze bleibt!», excloman ils acturs e las acturas al cumenzament dal giu su tschiel avert. Già en l'emprima scena dal teater vegn l'impurtanta rolla – tenor *Nikolaus Schmid* schizunt la rolla principala – da la chalira vesavla. En il setting da la stad 1947 a Cuira vegnan duas giuvinas assassinadas. Il policist («Landjäger») Walter Caminada cumenza gist cun las retschertgas, era sch'el avess sez basegn d'agid. Bainsvelt vegn Jürg Mehli, in surdmit che lavura sco famegl en l'instituziun per povers e povras, inculpà. Caminada però è sceptic ed investighescha vinavant, ensemen cun ses gidanter Peter Marugg...

## Sa transfurmar en paucas secundas

«A mai plaschi bain da giugar il cumissari», ri Nikolaus Schmid. «Igl è divertent da cuntinuar l'istorgia cun tschentar dumondas e da musar, co che Caminada sa revegn.» Al cumenzament dal giu fa il policist numnadamain ina parita maltarschinada e patescha d'ina dependenza d'alcohol e da tubac. Quai sa mida tras in inscunter casual cun la media Menga Fanzun, giugada da *Rebecca Indermaur*.

*Curdin Caviezel* ch'era sa participà a la seria «Metta da feïn» surprena gist duas rollas. «Il pachet da las duas figuras fitg differentas da Mehli e Marugg chat jau cool», di el. Curdin

Caviezel sto sa transfurmar svelt, per part en 15 secundas. Uschia al fetschia surstar, ch'intgins/aspectaturs ed aspectaturas realiseschan pir a la fin ch'el gioga duas rollas. El gaudia dentant fitg, da puspè pudair esser sin tribuna suenter bunamain in onn.

## «In teater per in vast public»

Tras in tip è «FRECH» vegnì sin l'idea da giugar in teater a basa dal roman da *Philipp Gurt*. «Suenter che nus avevan tractà in tema pli complex cun Bertolt Brecht en il toc da l'onn 2018, vulevan nus ussa preschentar in auter teater che pledenta dapli persunas», declera Nikolaus Schmid. D'avair ina varianta da text anc betg concepida per in teater, als haja interessà. *Gerhard Meister* ha lura dramatisà l'istorgia.

«Il temp d'oz n'è betg cumparegliabel cun l'onn 1947, uschè bles è sa midà», manegia Nikolaus Schmid. La stad da quel onn haja ditg vali sco stagiun da record pertutgant la chalira, ils davos onns sajan las temperaturas però stadas anc pli autas. Tuttina dettia ina parallela cun il temp dad oz: «Sco en il toc che gioga curt suenter la Segunda Guerra mundiala, ans chat-tain nus era oz cun la pandemia en il temp suenter ina crisa che n'è anc betg finida».

Pertutgant restricziuns da corona ha «FRECH» decidì ch'ils aspectaturs e las aspectaturas duajan purtar mascras. «Prender in

certificat da corona na vulevan nus betg, per motivs finanziais e per betg excluder tschertas persunas», manegia Nikolaus Schmid. Ins avessia stuì impunder bles daners per mesiras da segirtad.

## Sin tribuna da tutt'aura

«Sche pussaivel giugain nus adina, era schi plover levamain», di Curdin Caviezel. Ch'ins è exponì a l'aura saja in dals dischavantatgs d'in teater al liber. Era ramurs d'autos u da giuvenils che fan festa, sappian disturbar. L'atmosfera giuadora e las pussaivladads co utilisar la chasa da scola tar la «Quaderwiese» plaschan dentant fitg bain a Curdin Caviezel. Ins passentia ina stad nunemblaivla ensemen sco team.

Che tuts collavuran, amatur ed amaturas cun profis, plascha era a Nikolaus Schmid. Da preschentar anc il segund cudesch da Philipp Gurt «Helvetia 1949» n'è però betg planisà. «Quai na giess betg a prà cun nosa tradiziun. Nus vulain adina empruvar insatge nov», ri Nikolaus Schmid.

**Il teater al liber vegn anc preschentà intginas giadas fin ils 12 d'avust 2021. Dapli infurmaziuns èn da chattar sut [www.freilichtspiele-chur.ch](http://www.freilichtspiele-chur.ch).**